

14 July. 2026

समे .18:15 Hrs

<><><><><><>

Headlines

- जम्मू च राष्ट्री जांच एजेंसी एनआईए दी विशेष अदालतै लश्कर-एतैयबा आतंकी संगठन दे मुखिया हाफिज सईद खलाफ गैर जमानती वरंट जारी कीता ऐ।
- जम्मू-कश्मीर सरकार नै मरदमशुमारी-2027 दे कम्में च लग्गे दे कर्मचारियें लेई मानदेय दे रूपै च 25 करोड़ 36 रपे जारी कीते न।
- सरकार नै नशामुक्ति पंजीकरण पोर्टल तैहत सेवां लै करदे लाभार्थियें लेई आधार कार्ड राहें पंछान लाजमी करी दिती ऐ।
- साम्बा जिले दे इक खेत्तरै च लब्बे दे ड्रोन गी फोरेंसिक जांच लेई भेजेआ गेआ।
- ते मौसम विभाग नै औंदी 17 तरीक तगर जम्मू-कश्मीर च मौसम गर्म ते गुम्मे आले बने दे रौहने दी पेशनगोई कीती ऐ। 18 जुलाई थमां भारी बरखा ते किश इलाकें च चानचक्क हाड़ ते पस्सियां पौने दी बी चेतावनी दिती ऐ।

<><><><><><>

NIA-Warrant

जम्मू-कश्मीर च राष्ट्री जांच एजेंसी एनआईए दी इक विशेष अदालतै पाकिस्तान आधारित आतंकी संगठन लश्करे-तोयबा दे मुखिया हाजिफ सईद खलाफ गैर जमानती वरंट जारी कीता ऐ। एह कार्रवाई पिछले बरे होए दे पेहलगाम आतंकी हमले सरबन्धी मामले, जेह्दे च 26 लोक मारे गे हे, दे सिलसिले च कीती गई ऐ। आकाशवाणी दे जम्मू संवाददाता नै जानकारी दिती ऐ जे इस बारै हुक्म एनआईए अदालतै दे विशेष जज नै 8 जुलाई गी जारी कीता हा। वरंट जारी होने कोला 2 रोज पैहले 6 जुलाई गी एनआईए नै अदालतै च इक पूरक चार्जशीट दाखल कीती ही जेदे च हाफिज सईद गी इस हमले दा मुख्ब साजशकर्ता दस्सेआ गेआ हा। चार्जशीट च उसी व्यक्तिगत तौर पर लश्करे तैयबा ते एहदी परोख शाख टी.आर.एफ दे अध्यक्ष ते संस्थापक दे रूपै च बी आरोपी बनाया गेदा ऐ।

<><><><><><>

Census-Honorarium

जम्मू-कश्मीर प्रशासन नै मर्दमशुमारी 2027 दे कम्मै च लग्गे दे अधिकारिणं ते कर्मचारिणं लेई मानदेह गितै 25 करोड़ 36 लख रपे दी रकम मंजूर कीती ऐ। एह रकम योजना, विकास ते निगरानी मैहकमे दे राणं जिला ते सुबाई आयुक्तें गी जारी कीती गेई ऐ। जारी कीती गेदी रकम दी बंड ते बरतून बारै जानकारी निर्देश मूजब एह रकम योग्य कर्मचारिणं दे बैंक खातें च 31 जुलाई 2026 तगर जमा कराई दित्ती जाहग। जानकारी मूजब इन्यूमेटरें ते सुपरवाइजरें गी 9 ज्हार जिसलै कि जिला सतह दे अधिकारिणं ते एस.डी.एम.एं गी 20 कोला 25 ज्हार रपे दित्ते जाडन। आरक्षित कोर्ट च रखे गेदे कर्मचारिणं गी उआं इस मानदेय च शामिल नेई कीता गेआ ऐ जिंदे च टेक्निकल असिस्टेंट, एम.टी.एस ते होर दुए कर्मी शामिल ना।

<><><><><><>

Aadhar-Mandatory

जम्मू-कश्मीर सरकार नै नशामुक्ति पंजीकरण पोर्टल तैहत सेवां लै करदे लाभार्थियों लेई आधार नंबर पर आधारित पंछान कराना लाजमी करी दित्ता ऐ। सेहत ते मेडिकल शिक्षा मैहकमे दा आखना ऐ जे लाभार्थियों गी इलाज, सलाह-मश्वरा, दोआइयां ते होर दुई सेवाएं लेई आधार दा सबूत दस्सना लाजमी होग जेकर कुसै कोल आधार नेई ऐ। दवा नियंत्रक दफ्तर उनेंगी पंजीकरण च मदद करग। सरकार नै एह बी पक्का कीता ऐ जेकर कुसै कारणवंश प्रमाणिकरण असफल होई जंदा ऐ ते इलाज थमां मना नेई कीता जाहग कीजे पंछान दी तस्दीक लेई होर तरीके बी ऐन।

<><><><><><>

Amarnath Review

DG CISF ते DG रेलवे Protection फोर्स नै श्री अमरनाथ यात्रा 2026 दे सुरक्षा इंतजामें दा जायजा लैता। C.I.S.F. दे D.G.P. रंजन ते RPG दियां DG सोनाली मिश्रा होरें रेलवे ट्रैक्स ते महत्वै आहले सारे स्टेशनें दा जायजा लैता। अपने दौरे दौरान अफसरें गी बले दी तैनानी, बहु-स्तरीय सुरक्षा, इंतजामें, कुसै बी आपात स्थिति कन्नै निबड़ने आस्तै वैकल्पिक योजना ते बक्ख-बक्ख एजेंसियें बश्कार तालमेल बारे जानकारी दित्ती गेई।

<><><><><><>

Buddha-Amarnath Yatra

औंदी श्री बुड्ढा अमरनाथ जी दी जात्तरा शा पैहले पुंछ दे डिप्टी कमिशनर हुं'दे आसेआ खडेरी गेदी उच्ची सतह दी कमेटी नै अज्ज आधार शिविर ते होरनी महत्वपूर्ण थाहरें पर जात्तरा दे इंतजामें दा तफसीली जायजा लैता। कमेटी च जात्तरा दे अफसर पुनीत कार भरत नाग, तहसीलदार हवेली अजहर माजिद ते डीएसपी तानिया गुप्ता शामिल हे। दौरे दरान टीम नै एह पक्का कीता जे सलाना तीर्थ जात्तरा सुचारू ते सुरक्षित तरीके कन्नै करोआने लेई सब्बै मुतल्लका मैहकमे तैयार रौहना। निरीक्षण दरान बेस कैप ते जात्तरा आले रस्ते पर बुनियादी स्थूलतां जिआं

जे हिरायश, साफ-सफाई, पीने आह्ला पानी ते बिजली सने होरनें दुइयें चीजें पर चेचा ध्यान दित्ता गेआ। इस बारै होर जानकारी दिंदे होई कमेटी दे सदस्यें आखेआ

<><><><><><>

Drone-Recovered

जम्मू-कश्मीर दे साम्बा जिले दे चक सलारिया इलाके च देवक नदी कश इक खेत्तरै च इक ड्रोन बरामद कीता गेआ ऐ। एह ड्रोन बडुलै 10 मिनट घट्ट 6 पर इक मकामी बसनीक गी लब्बा जिसलै ओह बडडलै सैर करने जा'रदा हा ते उन्नै तुरत इस बारै सूचना नेडे दी सेना युनट गी दित्ती। भारती सेना नै ड्रोन गी अपने कब्जे च लेई लैता ऐ ते इसी फोरेंसिक जांच लेई भेजी दित्ता गेआ ऐ जेह्दे नै एह पता लग्ग जे इसी कीहू, कुदरा ते कुन्नै भेजे दा ऐ। सुरक्षा बलें इस बरामदगी दे बाद इलाके च व्यापक तुपाई अभियान बी चलाया ऐ।

<><><><><><>

Vacations

जम्मू-कश्मीर सरकार नै कश्मीर डिविजन ते जम्मू संभाग दे सयालू आले जोन दे सब्भनें सरकारी डिग्री कालजें लेई गर्मी दियें छुट्टियें दी तरीकें दी घोशणा कीती ऐ। आकाशवाणी दे जम्मू संवाददाता नै जानकारी दित्ती ऐ जे उच्च शिक्षा विभाग दे आधिकारिक आदेश मूजब इनें कालजें च 21 जुलाई थमां 2 अगस्त 2026 तगर गर्मी दी छुट्टियां होडन। मेद ऐ जे इस फैसले कन्नै विद्यार्थियें, शिक्षकें ते अमले गी बडी मती गर्मी थमां राहत थ्होग।

<><><><><><>

JKCIP-Ramban

रामबन च भिडु पालन विभाग आसेआ जे.के.सी.आई.पी स्कीम दी असरदार अमलावरी लेई लगातार जत्न करा'रदा ऐ जेह्दा मकसद करसानें दी औंदन च बाद्दा करना ऐ। इस स्कीम तैहत राईबाई सरबंघत स्टार्ट अप ते करसान उत्पादक संगठनें गी माली सहायता प्रदान कीती जंदी ऐ। इससै सिलसिले च मैहकमे आसेआ ब्लाक सतह पर दोआर-कर्जे सरबंघी कैंप बी लाए जा'रदे न तां जे करसानें गी लाभार्थियें पर केंद्रित स्कीमें बारै जानकार बनाया जाई सकें इस बारै होर जानकारी दिंदे होई जिला भिडु पालन अधिकारी डा. शब्बीर अहमद खान होरें दस्सेआ

<><><><><><>

Weather

मौसम विभाग नै अज्जै कोला लेइयै 17 जुलाई तगर जम्मू-कश्मीर दे बक्ख-बक्ख हिस्से च गर्मी ते गुम्मे दे कन्नो-कन्नो बिच्च-बिच्च किश समें लेई हलकी बरखा दी पेशनगोई कीती ऐ। जारी जानकारी मुजब 18 कोला 20 जुलाई दे दौरान केन्द्र शासत प्रदेश दे मते सारे हिस्सें च गर्ज चमक कन्नै बरखा बरने दे असार दस्से गेदे न। इस दरान

संवेदनशील इलाके च चानचक्क हाड औने ते पस्सियां पौने दी बी चेतावनी दिती ऐ। लोकें गी सलाह दिती गई ऐ कि ओ भारी बरखा ते गड़कने चमकने दौरान मते सौहगे-सतर्क रौहन।

<><><><><><>

Adv. Announcement

आकाशवाणी जम्मू दे प्रादेशिक समाचार एकांश ने प्हाड़ी भाशा लेई कैजुअल न्यूजरीडर-कम-ट्रांसलेटर ते स्टेनोग्राफर दे पैनल च शामिल होने लेई जम्मू-कश्मीर दे रौहने आहले 21 शा 50 बरें धोड़ी दी उम्री दे इच्छुक मेदवारें कोला दरख्वास्तां मंगियां न।

कैजुअल न्यूजरीडर-कम-ट्रांसलेटर लेई घट्टोघट्ट योग्यता कुसै मान्यता हासल यूनिवर्सिटी थमां ग्रेजुएशन ते प्हाड़ी भाशा दी शैल जानकारी दा होना ऐ। न्यूजरीडर लेई (प्रसारण लेई मुआफक) खरी अवाज दा बी होना जरूरी ऐ।

स्टेनोग्राफर लेई, घट्टोघट्ट योग्यता कुसै मान्यता हासल एजुकेशन बोर्ड थमां 12मीं पास होना ते प्हाड़ी भाशा च खरी जानकारी दा होना ऐ। कन्नै गै, कम्प्यूटर पर प्हाड़ी भाशा च टाइपिंग दी स्पीड 25 कोला 40 लफ़्ज़ फी मिनट होनी लोड़चदी ऐ।

आवेदन दी हार्ड कॉपी 'हेड ऑफ न्यूज, रीजनल न्यूज यूनिट, आकाशवाणी, पंजतीर्थी जम्मू पिनकोड-180001' दे दफ्तरै च (दस्ती) जमा करोआनी होग। एह्दे कन्नै सब्बै जरूरी दस्तावेज ते आवेदन शुल्क बी होना चाहिदा (जेहड़ा वापस नेई होग)। सामान्य श्रेणी दे मेदवारें लेई एह् शुल्क 355 रुपे ते एस.सी/एस.टी/ओ.बी.सी मेदवारें लेई 265 रुपे (18 फीसद जी.एस.टी सने) ऐ।

एह् शुल्क प्रसार भारती, आकाशवाणी, जम्मू दे बैंक खाता नंबर 10582387126(एस.बी.आई मेन ब्रांच, हरि मार्केट, जम्मू) च ऑनलाइन जमा कीता जाई सकदा ऐ। आई.एफ.एस.सी कोड: SBIN0000657 ऐ। शुल्क जमा करने दे बाद मिले दे स्क्रीनशॉट दा प्रिंटआउट जां ऑनलाइन पेमेंट/ट्रांजैक्शन आई.डी, आवेदन दे कन्नै जरूर होनी लोड़चदी। आवेदन करने दी खीरी तरीक 19 जुलाई 2026 (ऐतवार) ऐ। मती जानकारी टेलीफोन नंबर 0191-2546658 ते 9697177241 पर लैती जाई सकदी ऐ। तफ्सीली इश्तेहार ते आवेदन फॉर्म साढ़ी वेबसाइट www.newsonair.gov.in पर होमपेज दे अखीरै च 'Vacancies' आइकन पर उपलब्ध ऐ।

<><><><><><>